

Ebazpena: R031/2023

Espedientea: 13/2017

Vitoria-Gasteizen, 2022ko martxoaren 22an.

Euskal Autonomia Erkidegoarekiko Ekonomia Itunaren Arbitraje Batzordeak, Violeta Ruiz Almendral batzordeburu andreak eta Sofia Arana Landín batzordekide andreak eta Javier Muguruza Arrese batzordekide jaunak osatutakoak, hau erabaki du:

ERABAKIA

Zerga Administrazioiko Estatu Agentziak (aurrerantzean, AEAT) Arabako Foru Aldundiaren (aurrerantzean, AFA) aurrean planteatutako gatazkari buruz, DGF jaunaren egoitza-aldaketaz zehazki (2006ko urtarrilaren 1etik aurrerako ondorioekin). Gatazka hori Arbitraje Batzorde honetan izapidetzen ari da, 13/2017 espediente-zenbakiarekin.

AURREKARIAK

1.- DGF jaunak, ZAEAREN datu-basearen arabera, Oiongo (Araba) E kalean du egoitza, eta haren ezkontideak, MMR andreak, aldiz, Logroñoko A kalean; garai bateko Herri Administrazioen Ministerioan azken hori agertzen da zergapekoaren egoitza gisa; Gizarte Segurantzaren Diruzaintza Nagusian horixe du egoitza gisa, eta garraiolari gisa jarduten duen egoitza Oiongo G kalekoa da, 2006ko martxoaren 1ean jarduera horretan baja hartu zuen arte. Estatistikako Institutu Nazionalaren datuen arabera, DGF jauna, 2005eko urtarrilaren 1etik 2007ko

uztailaren 1era bitartean, Logroñoeko eta Oiongo zazpi egoitzatan egon da erroldatuta txandaka, eta azken egoitza Oiongo P kalekoa da.

2.- Hainbat egiaztapen-jarduketa egin ondoren, ZAEAk ondorioztatu du DGF jaunak Logroñoeko A kalean duela egoitza 2006ko urtarrilaren 1etik.

3.- 2011ko ekainaren 7an, DGF jaunaren zerga-egoitza Oiongo E kaletik Logroñoeko A kalera aldatzeko proposamena jakinarazi zion ZAEAk AFARI, 2006ko urtarrilaren 1etik aurrerako ondorioekin. Proposamen hori 2015eko otsailaren 20an errepikatu zen, oraingoan 2010eko urtarrilaren 1etik aurrerako ondorioekin.

4.- Ekonomia Itunaren 43. artikuluan ezarritako lau hilabeteko epea igarota, AFAk ez zion proposamenari erantzun, eta ZAEAk 2017ko maiatzaren 30ean aurkeztu zion gatazka Ekonomia Itunaren Arbitraje Batzordeari. Bertan, egoitza-aldaketa eskatu zuen, 2006ko urtarrilaren 1etik aurrerako ondorioekin.

5- Gatazka prozedura arruntaren bidez izapidetu da, eta, beraz, bete egin da AFAk alegazioak egiteko eta frogak eta dokumentazio egokiak aurkeztu eta proposatzeko izapidea. AFAk izapide hori betetzeko epea luzatzeko eskatu ondoren, azkenean, amore emanda, onartu egin du ZAEAk proposatutako egoitza-aldaketa.

ZUZENBIDEKO OINARRIAK

1.- Arbitraje Batzordearen eskumena

Arbitraje Batzordeak gatazka ebazteko eskumena dauka, Ekonomia Itunaren 66.Bat.c) artikuluan xedatutakoaren arabera, berari esleitzen baitio *Zergadunen egoitza dela-eta sor litezkeen desadostasunak ebaztea*.

2.- Amore ematea

Interesdunik eta, bereziki, zergapekoa bera aurkeztu ez denez, AFAk amore emateak, ZAEAk egindako helbide-aldaketaren proposamena onartuta, bi administrazioen arteko gatazka bertan behera geratzea eragin du, eta Ekonomia Itunaren Arbitraje Batzordearen aurrean bideratzen den prozeduraren xedea gerora desagertzea eta, ondorioz, artxibatzea ekarri du.

Horiek horrela, Arbitraje Batzordeak hauxe

ERABAKITZEN DU

1.- Gatazka artxibatzea prozeduraren xedea gerora desagertu delako, AFAk amore eman baitu DGF jaunaren egoitza Logroñoko A kalera aldatzeko (2006ko urtarrilaren 1etik aurrerako atzeraeraginarekin) ZAEAk egindako proposamenari dagokionez.

2.- Erabaki hau Zerga Administrazioko Estatu Agentziari, Arabako Foru Aldundiari eta DGF jaunari jakinaraztea.